

3
R.^{MI} P.D. CAJETANI PASSARELLI

Clerici Regularis

*Sanctæ Romanæ Universalis Inquisitionis Qualificatoris,
& Catholicæ Regis à Concionibus.*

E P I S T O L A

Ad Illustrissimum ac Reverendissimum D.

PROSPERVM BOTTINIVM

*Archiepiscopum Myrensem, & Fidei
Promotorem, Sanctique Officij
Consultorem &c.*

DE OPERE INSCRIPTO:

SACRA MONARCHIA

S.LEONISMAGNIPONT.MAX.

passim & ubique fulgens

IN POLEMICA HISTORIA

CONCILII CHALCEDONENSIS.



Varis à me, Illustrissime ac Reverendissime Domine, & eo jure, ac potestate quæris, qua dudum arctissimè tibi tot officiis, ac titulis mancipatus obtemperare cogor, ut exponam, quid ego sentiam de hoc secundo Volumine, quod Ad. Reu. Pater Joannes Laurentius Lucchesinius è Societate Jesu, non minus sanguine

guine tibi, quàm virtutum splendore cognatus, laudem
cxiniã primo quoque Volumine partam augendo ,
composuit . Et planè tua præcepta tam mihi honorifica ,
quàm jucunda cum alacriter suscepissem , ut in primis
cluceat, quantum utilitatis, atque decoris hic Liber Aposto-
licæ Sedi sit collaturus, placet, totam Voluminis seriem
retexere , & per fidele compendium alio ordine tradere ,
ut inde quisque facilius Nova , atque Fortia ab Auctore
porrecta Jacula arripiat, quibus non rectè erga Sedem
Apostolicam opinantes evincat . Eruditissimus quippe
Auctor Sacri Concilii Chalcedonensis Historiam Pole-
micam texens juxta rerum , & temporum ordinem ex do-
ctrina, rebusque Synodalibus gestis argumenta pergendo
colligit, quibus Supremam Romani Pontificis Potesta-
tem Monarchiæ nomine expressam vehementer confir-
mat. Ego verò epilogum Operis compacturus quædam
ex his argumentorum telis , suo loco , & ordine extracta
in tria distincta armamentaria coniiciam, ubi Sedis Apo-
stolicæ studiosis parata sint arma , tribusque ritè disposita
partibus , unde solent nonnulli Vaticani fastigium pete-
re . Tria enim potissimum circa Jus Pontificium in quæ-
tionem jactantur . An sententia, sive iudicium Romani
Pontificis sit ab Ecclesia emendabile ? An idem Pontifex
Universali Concilio Superior emineat? ac tandem An ip-
se, dum ex Cathedra Fidei *Deareta loquitur* , infallibilis
sit ? Ad tres præliares istos suggestus Sedi Apostolicæ op-
positos , & infirmis , vanisque iētibus obstrepentes amo-
liendos, quæ , & qualia arma in hoc Libro suggerat Au-
ctor per compendium ostendam , eaq; in suo separato ar-
mamentario seponam .

Priori pro assumpto de Sententia , & Iudicio Romani
Pontificis per Ecclesiam irretractabili, valet & Libri Titu-
lus : *Satra Monarchia* ; hæc enim, ex Aristotele lib.3. Po-
litic. vno Capite, ac Supremo Rectore constat, qui om-
nia

nia suo arbitrio, & voluntate rapit, & cujus adamantina
ferè Decreta nec Tribunalis, nec cujusque vis Magistra-
tus, aut universi auctoritas Regni rescindere jure valet.
Hanc porro Ecclesiasticam Monarchiam asserturus, hæc
inter alia argumenta exhibet Auctor. Apud Concilium
Chalcedonense sæpe simplex hoc nomen *Universalis*, aut
Ecclesie Universalis Episcopi aliàs à tota Synodo, aliàs à
quibusdam Episcopis, vel Apostolicæ Sedis Legatis Papæ
Leoni invenitur adscriptum, qui congruere Titulus mini-
mè potest Supremo nisi Reçtori, & summam, plenamque
velut Monarchæ super Universam Ecclesiam potestatem
habenti. Proinde D. Thomas in Opusculo contra errores
Græcorum hoc Summum Romani Pontificis Jus, & ple-
nitudinem potestatis Ecclesiam circumplectentem de-
monstraturus allegavit, Concilium Chalcedonense ac-
clamasse Magno Leoni: *Papa Leo Sanctissimus Apostolicus*
& Icumenicos, idest, *Universalis Patriarcha*. Neque
hujus argumenti vim enervare Constantinopolitani An-
tistitis supercilium, qui eundem sibi Titulum petulanter
adjecit, satis hîc explicat Auctor, & fusius in altero Li-
bro explicuerat, cui titulus est: *Demonstrata impiorum In-*
sania. In eodem Concilio Chalcedonensi proscriptus
cum esset Dioscorus Alexandrinus Antistes in hunc mo-
dum Synodalis damnationis *Sententia* manavit: *Sanctis-*
simus, & Beatissimus Archiepiscopus magnæ, & senioris Ro-
mæ Leo per nos, & per presentem Sanctam Synodum, unà
cum ter Beatissimo, & omni laude digno Beato Petro Apostolo,
qui est Petra, & Crepido Catholica Ecclesiæ, & rectæ fidei
fundamentum, nudavit eum tam Episcopatus dignitate &c.
Vbi rectè notatur, quod principalis Synodi actio, ac re-
rum propemodum summa in Leonis Persona, nedum ut
Concilii, sed etiam Ecclesiæ Reçtore, atque Capite col-
locatur: nimirum quia Petrus, & qui ei in Officio ac Po-
testate succedit, est crepido, & Fundamentum, cui uni-

pag. 168
& 194.

pag. 190

versæ Ecclesiæ moles incumbit . Quod autem sustinetur ,
 ab eo, cujus innititur viribus, dependere necesse est . Ex
 hac præterea authentica interpretatione Concilii multum
 ruboris pudorisque illis suffundi debet, qui illa Evangelica
 verba: *Tu es Petrus, & super hanc Petram ædificabo Ec-*
clesiam meam, & tibi dabo claves regni celorum: in fauorem
 Ecclesiæ in communi, non singularis Personæ Petri tor-
 tuosa intelligentia detorquent; siquidem hujus Synodi
 Acta verba Evangelii, & per illa significatum peculiari
 Personæ Petri, & Officio tantummodo applicant, & ab il-
 lo subinde in alios ministros fuit . Qua veritate, ut vide-
 tur, firmiter stabilita, nihil ultra facultatis, aut virium
 ad contendendum superest adversariis . Item Concilium
 Chalcedonense in Synodica, qua à Leone Actorum Con-
 firmationem efflagitat, de eodem Divo Leone dicit: *Cui*
Vinea custodia à Salvatore commissa est, ubi Synodi Patres
 unam, & integram Vineam Ecclesiæ Catholicæ loco sta-
 tuunt, ideoque Unum, Supremumque Custodem, & Cu-
 ratorem, cui cæteri Custodes subordinati ministrent: quo
 nihil quidem expressius, ac dilucidius effingi pro Monar-
 chico Ecclesiæ declarando Regimine potest, cum omnia
 infra Custodiam, & Unius Principis altitudinem jaceant .
 Introspectit hanc Romani Pontificis Majestatem inter Cæ-
 sarei quoque diadematis radios Marcianus Augustus, &
 tunc primum ad Imperii solium evectus, cum vellet do-
 minationis initia feliciter auspicari, hoc dignum Chris-
 tiano Principe obsequium Divo Leoni scribendo reddi-
 dit: *Tuam Sanctitatem, Principatum in Episcopatu Divina*
Fidei possidentem, sacris literis in principio justum credimus
alloquendam . Quo loco illustrare videtur Augustus illud
 Divi Cypriani in tractatu de Ecclesiæ Unitate positum ar-
 gumentum, quo nihil jacitur efficacius ad Ecclesiæ Mo-
 narchiam asserendam: *Episcopatus unus est, & Ecclesia una:*
 eademque planè ratione Sanctus Stephanus Papa, Leo,

pag. 170

pag. 101

alii-

aliqui Romani Pontifices sese *Episcoporum Episcopos* nuncuparunt, & à Divo Bernardo, & aliis, multisque Patri-
 bus eodem titulo ornati sunt. Sed longè clarius idipsum
 expresseit Valentinianus Theodosii junioris Collega, cum
 ipsum Theodosium sic per epistolam est allocutus: *Qua-* pag. 87.
tenus Beatissimus Romane civitatis Episcopus, cui Principa-
tum Sacerdotii super omnes Antiquitas contulit. Neve for-
 tasse verba Cæsaris cavilleris, quod Primatum dumtaxat,
 Ordinisque prærogativam, non Jus universalis Regiminis
 indicent, statim idem Valentinianus adjecit: *Locum ha-*
beat de fide, ac Sacerdotibus judicare. Judicium quippe
 legitimum, quod super omnes Pontificem possidere diser-
 tè Valentinianus testatur, Jurisdictionem advolvit. Ac-
 cedit & aliud locuples testimonium ex eadem regnatrice
 domo selectum, Gallæ nempe Placidæ, quæ de Aposto-
 licæ Sedis auctoritate ita per epistolam Imperatori loquit-
 tur: *In qua primus ille, qui celestes claves dignus fuit acci-* pag. 91.
pere, Principatum Episcopatus ordinavit: deinde in Leonis
 favorem flectens, & quantum Imperatoriam dignitatem
 deceret, illum patrocinari, vulnera Ecclesiæ per Ephe-
 sum latrocinium inflicta refarcire curantem, apposuit:
Diligentius autem in hoc providere, ne, quod priscis tempori- pag. 92.
bus nostra generatio custodivit, sub nobis imminui videatur,
& per præsens exemplum Schismata generentur inter Episco-
pos, & sanctas Ecclesias. Uni quippe Leoni cuncta pro-
 spicienti, & irruentibus undique malis solatium, & me-
 dicinam afferre sedulò cogitanti, inhærere, sectari neces-
 se erat, ne passim Schismata emersa, & turbas exagitan-
 tia pessum Ecclesiam darent. Cohæret aurex huic Pla-
 cidæ sententiæ illa celebris Divi Hieronymi in lib. 1. con-
 tra Jovinianum: *Ex duodecim unus eligitur, ut Capite con-* pag. 89.
stituto Schismatis tolleretur occasio: quia nisi unius Senten-
 tia, uniusque Judicium, utpote Capitis, Supremique Re-
 ctoris in tota Ecclesia vim ineluctabilem haberet, daretur
 Schif-

Schismati locus aliorum alia censentium , & varia pro variis sententiis templa & altaria struentium , & tot Capita , quot sententiæ in confusione , ac tumultu Ecclesiam Dei permiscerent : quibus calamitatibus , aliisque publicis detrimentis Christus occurrere voluit uno Capite , uno Supremo Judice , uno contentionum Arbitro constituto . Qui veritatis radius ne Ethnicos quidem inter erroris caliginem latuit ; refert enim Tacitus in primo Annalium libro, ob certamina potentium, & ardorem seditionum Romanæ reipublicæ afflicta, tunc ad unum delatis rebus, succurrisse Monarchiam : & fusius idem explicat Aristoteles jam allegatus . Alia , & firma argumenta in proposito Auctor adducit, quorum pars quia cum cæteris ante jactis Articulis connexionem habet , alteri loco seponitur .

Hujusmodi itaque Monarchiæ , atque Monarchæ Jus est, quod ita ejus Decreta vigeant , atque consistant , ut à nemine in terris dissolvi possint, quemadmodum etiam, ne intra limites Monarchiæ Tribunal , aut Magistratus , aut quæcunque Potestas existat , quæ jure Monarcham subigere valeat . Ita docet Aristoteles Politic. lib. 3. cap. 11. & lib. 4. cap. 2. quem pro Monarchia Ecclesiæ in hunc modum constituta citat Sanderus lib. 3. cap. 3. Ex quo ad alium firmandum Articulum transeo , seu ad alterum instruendum ~~armamentarium~~ , quod adversus assertores Concilii supra Papam Auctoritatis tela ministret . Et primò aliquid eruitur ex Actis Concilii Secundi Ephesini, quod licet statim degeneraverit in Latrocinale , tamen certè Generale fuit ; ex eo enim patet Pontificium Jus excipiendi omnium , etiam Orientalium, Appellationes, adeoque Jurisdictio supra Universam Ecclesiam , & Potestas damnandi, aut comprobandi Generalia Concilia . Impiè , & iniquè Flavianus Constantinopolitanus Antistes damnatus, ac sua Sede dejectus Apostolicæ Sedis

Le-

Legatis porrecto libello de Synodali Sententia ad Papam Leonem appellavit; cuius vis Appellationis adeo prævaluit, ut Placidia in præfata epistola monuerit Theodosium Imperatorem, ut tot flagitiis, ac turbis ea tempestate miscentibus omnia ob Ephesinam Synodum concitatis, Flavianus, qui Leonem appellaverat, per omnia illæsus, & integer servaretur *In statu Sacerdotali illafo manente per omnia Flaviano*. Nam Flaviani Appellationem, quam in hoc loco Placidia innuit, liquidius Theodosio Imperatori scribens Leo Pontifex explanavit: *Nostri fideliter reclamationum* (Legati scilicet Apostolicæ Sedis) *& ipsæ libellum Appellationis Flavianus Episcopus dedit*. Eandem viam appellationis ad Leonem directæ tenuit Episcopus Theodoretus in ipsa Ephesina Synodo quoque damnationis sententia percussus, ut constat ex Actis Concilii Chalcedonenfis. Ne verò reponas, hoc Concilium non fuisse legitimum, his adiicio Macarium Antiochenum, & alios à Sexta, ac Sacrosancta Generali Synodo condemnatos, qui cum ad Romanum Pontificem provocassent, Romam ad prosequendam causam dimissi sunt, sicut his verbis refert Constantinus Augustus Pogonatus, qui eidem Synodo interfuit, in Epistola Leoni Papæ II. reddita: *Omnes verò scriptis precibus Serenitatem nostram communiter precati sunt, ut eos ad Beatitudinem vestram mitteremus*. Sic igitur fecimus vestro paterno Iudicio omnem ipsorum causam permittentes. Extat hæc Epistola post Sextæ Synodi Acta apud Editionem Romanam jussu Pauli V. excusam. Exploratum est autem, omnique iure firmum, & inconcussum, non licere Appellationem nisi ad majus Tribunal deferri. Quocirca rectè & appositè Auctor etiam animadvertit, quod cum apud Concilium Chalcedonenfe Acta Ephesinæ Secundæ Synodi publicè legarentur, atque ad id ventum esset, quod Flavianus Sententia Synodica ictus ad Leonem de gravamine provocaf-

casset, eiusque Appellationem Dioscorus aspernatus nihil de sua impietate, & scuitiā remittere voluisset, horrore, atque stomacho Patres affecti unanimes exclamarunt: *Anathema Dioscoro: hac hora damnavit, hac hora damnetur. Sancte Domine, tu illum vindica. Catholice Imperator, tu illum vindica. Leoni multos annos. Acta* verò secundæ Ephesinæ Synodi in Chalcedonenſi relecta sunt, ut Dioscori scelera, cujus causa ventilabatur, palam omnibus fierent, eaque percurſa, maledictisq; proſciſſa conſenſu quoque Patrum in irritum abiire. Verumtamen eadem iniqua perversaque Acta longè antequam ad Concilii Chalcedonenſis cognitionem accederent, jam projecerat, ac ſuprema ſua Auctoritate calcaverat Divus Leo; unde Hilarus Diaconus, qui ut Leonis Legatus eidem Synodo interfuit, ſcripſit ad Pulcheriam Auguſtam:

Pag. 80. *Veſtra igitur veneranda clementia agnoſcat, à præſato Papa (ſcilicet Leone) cum omni Occidentali Concilio reprobari omnia, qua in Epheso contra Canones, & per tumultus, & odia ſecularia geſta ſunt à Dioscoro Episcopo. Quod ſanè pro ſummo, Synodoque altiori, Romani Pontificis Jure argumentum ſuo pondere valet; cui enim fas eſt expungere Legem, is neceſſariò ſupereminet Legi; Synodica verò Acta Eccleſiaſtica Leges ſunt. Quod ſi objeceris, illa Acta non fuiſſe Synodica, hoc ſaltem patet in reliquis Synodis à Sede Apoſtolica reprobatis. Suffragatur huic ſolidæ veritati ſuo quoque calculo appoſito idem Valentinianus Collega Theodoſii, qui ad ipſum ſcribens Imperatorem, eundemque monens de futuræ Synodi utilitate, qua Eccleſiæ ſcandala, ac detrimenta ab Ephesine Synodo cumſulata rependerentur: *Ut prædictus (ſcilicet Leo, inquit,) congregatis ex omni orbe etiam reliquis Sacerdotibus intra Italiam, omni præjudicio ſubmoto, à principio omnem cauſam, qua vertitur, ſollicita probatione cognoscens, ſententiam ferat, quam fides, & ratio veræ Divinitatis ex-**

Pag. 89. *peſtu-*

postulat . Quo verborum sanè contextu Cæsar Concilii
Actionem, Auctoritatem, & vim decernendi primariò in
Romano Pontifice, velut Supremo Synodi Iudice, locat.
Eosdem profectò sensus, iisdemque terminis explicatos
pro excellentia Papæ supra Concilium expromit Marcia-
nus Augustus, cum de conditione, & forma congregandi
Concilii Papæ Leoni scribens: *Omnes sanctissimi Episcopi* pag. 103
(inquit) *debeant convenire, & quæ Christianorum Religio-
ni, & quæ Catholicæ Fidei profint, sicut Sanctitas tua secun-
dum Ecclesiasticas Regulas definiverit, sua dispositione de-
clarent.* Quo planè videtur Definitio apud Synodos ad
Romanum Pontificem pertinere; non quia re vera Epis-
copi vacent à jure definiendi, sed quia eorum Sententia,
aut corrigenda, aut delenda, aut denique confirmanda
Summo Pontifici, ut Supremo Judici, submitatur. Qua
porrò de causa in Conciliis Generalibus, quæ in Occi-
dente, ipso præsentè Romano Pontifice, facta sunt, cum
res sanciri contingat, *Sacro approbante Concilio*, reperitur,
ita Summum Pontificem decernere voluisse, aut jussisse,
quia nimirum Definitio, aut Decreta ratione Supremi Juris
primariò ad Pontificem Maximum spectant. Hæc canonica
sunt testimonia, Imperatoriis quoque attestationibus de-
corata. Nec quidem verisimile apparet, adeo apud Gre-
cos Imperatores Ecclesiæ Latinæ ac Romanæ gratiam in-
valuissè, ut ea Juri præponeretur. His accedit exemplum
robustius, & gravius ex Synodi quasi visceribus prodians.
Flaviano Constantinopolitano Antistite ob Fidei Catho-
licæ defensionem atroci facinore extincto, Synodus Ephe-
sina Secunda cum ad electionem novi Antistitis devenis-
set, pleno suffragio Anatolium substituit. Atqui Theo-
dosius Augustus, qui ab hæreticis circumventus castam,
& integram illam Synodum prædicabat, simul etiam per
eam stillantia Ecclesiæ ulcera obducta, Flavianumque ju-
re fustibus cæsum, & morte mulctatum, datis ad Papam

Leonem literis, illum enixè rogavit, ut Anatolium Constantinopolitanum Antistitem ab Ephesina Synodo electum Apostolico jure firmaret; cui ita rescripsit Leo: *Ne aliquid in præjudicium Catholice defensionis viderer egisse, de ordinatione ejus (scilicet Anatolii) qui Constantinopolitana capitis Ecclesie præsidere, nihil interim in alterutram partem temerè rescribendum putavi, non dilectionem negans, sed manifestationem Catholica veritatis expectans: nimirum Fidei professionem juxta Regulam ab ipso Leone Ephesino Concilio traditam ab Anatolio mittendam expectans. Immotum itaq; & fixum Imperatoris animo erat, Papam omnino superiorem Concilio esse; electio enim Synodica, nisi à Romano Pontifice confirmata, cassa, & irrita foret. Compertum est autem, Confirmationem legitimam emanare nisi à superiore Magistratu, vel Principe minimè posse. Inde etiam est, quod si Leo hanc Confirmationem, quæ humiliter petebatur, concedere respuisset, tanquam superior quoque electionem Synodi rescidisset. Eapropter apud Concilium Chalcedonense cum Patres ejusdem Secundi Ephesini Acta discuterent, & ferè omnia ibi, ut fædè, ac turpiter facta, detestarentur, illibata tamen, & integra, quæ constabat, Sanctum Leonem confecisse, vel approbasse, concordēs penitus reliquerunt. Synodus hæc Ephesina Antiochenæ Ecclesiæ Antistitem Maximum constituerat. Evenit, ut cum hujus Synodi Acta coram Chalcedonensis Synodi Patribus legerentur, incideret lectio Maximi ad Antiochenam Sedem evecti. Infesti huic Ephesinæ Synodo erant Chalcedonis Patres omnes, ejusque Acta in frustra prope concidi, & in pulverem verti anhelabant; nihilo tamen minus, dum Maximus legebatur hujus Synodi opera in Patriarchali Sede statutus, Anatolius, cui omnes deinde assensere, reposuit. *Definimus, nihil horum valere, quæ in illa, quæ dicitur Synodus, sunt facta, nisi circa Sanctissimum Maximum magna Antiochenæ civitatis*
Epi-*

*Episcopum, quoniam & Sanctissimus Leo Romanus Archiepiscopus in communionem eum recipiens præesse eum Antiochen-
sium Ecclesie judicavit. Porro hic attendere juvat vim po-
testatis superioris Synodi impetum retardantis, justoque
furori frænos iniicientis; omnia quippe Synodi Acta rueret
Anatolius fatetur præter Maximi Episcopatum Leonis au-
thoritate suffultum.*

Idem Concilio longè superius jus Pontificium maxi-
mè elucet in facto Dioscori. Erat hic Alexandrinus Antis-
tes, vir factiosus, acer, turbulentus ingenio, profligati-
que pudoris, omniumque scelerum auctor, quæ Ephesi-
nam illam Synodum polluerunt. Proinde inani fiducia
Synodum Chalcedonensem ingressus locum invasit Ale-
xandrino Antistiti addictum, ibique inter Episcopos su-
percilio nimis erecto consedit. Tunc Paschasius Aposto-
licæ Sedis Legatus intonuit: *Beatissimi, atque Apostolici*
viri Papæ urbis Romæ præcepta habemus præ manibus, quibus
præcipere dignatus est ejus Apostolatus, ut Dioscorus Alexan-
drinus Archiepiscopus non sedeat in Concilio, sed audiendus
intromittatur. Hoc nos observare necesse est. Hoc Leonis
mandato exposito Patres non rem in disceptationem vo-
carunt, non urnam expedierunt, non calculos numera-
runt; sed Papalis vigore præcepti, cujus ne nomen qui-
dem sustinuissem, si Concilium supra Papam censerent, lo-
co pulsus Dioscorus in medio tanquam reus ad causam di-
cendam est constitutus; satis quippe cognitum erat, quod
ubi Papæ Præceptum palam Synodo exprimitur, non nisi
obedientiæ meritum, & venerationis officium Synodi Pa-
tribus superest. Contra verò Theodoreto etiam Episcopo
contigit, qui cum à Concilio Ephesino Secundo damnatus
esset, & de ejusdem Concilii sententiâ ad Divum Leonem
appellavisset, jam deinde à Leone absolutus, & suæ Ec-
clesiæ redintegratus, absque alio Decreto in Synodum
Chalcedonensem admissus, communisque juris suffragii

pag. 113

particeps factus est, quemadmodum Acta testantur. *In-*
grediatur Reverendissimus Episcopus Theodoretus, ut sit par-
ticeps Synodi, quia & restituit ei Episcopatum Sanctissimus
Archiepiscopus Leo. Verumtamen cum propter Theodo-
reti receptionem nonnullæ interiectæ difficultates fuissent
aliquorum frementium, aut inustantium, quod fautor
quandoque Nestorii fuisset, quod in ejus erroris cæno se
turpiter volutasset, quod adversus Divum Cyrillum nefari-
è itylum exacuisset, evicit tandem Divi Leonis senten-

tia, concorsque Synodus exclamavit: *Theodoretus dignus*
est Sede. Archiepiscopo Leoni multos annos. Post Deum Leo
judicavit. Observa autem hîc momenta verborum: *Post*
Deum Leo judicavit. Duo videlicet Tribunalia in Catho-
lica Ecclesiâ cum cælesti coniuncta patere, aliud Christi,
setu Dei, aliud ejus Vicarii, Romani nempe Pontificis:
simul bina inter hæc Tribunalia, cum sint ipsa connexa, &
unum immediatè pendeat ab alio, medium ullum non in-
teresse, sicut nec interest inter Principem, & Vicarium.
Quapropter si Concilium Universale separatum à Papali,
vel non isti subordinatum Tribunal constat, vel ante Deum,
vel post Leonem hoc novum Tribunal ponendum est. Ap-
positè hoc argumentum expendit Iacobatius in tractatu de
potestate Papæ supra Concilium, illud deducens ex illa
Regula Juris, quod Principis, & Vicarii unum sit Tri-
bunal.

Sed manifestius, & clariùs hæc veritas liquet in po-
tissima quæstione apud hanc Synodum agitata, & re vera
omnium majori, quæ in toto Concilii decursu reperiuntur.
Anatolius Constantinopolitanus Antistes peste Eutychetis
fortasse quondam afflatus, nec in præsens, saltem in spe-
ciem, ab illa prorsus immunis, pro Fidei Formula ab ipso
Concilio contra Eutychetem conficienda, & propter quam
Concilium coierat, ita hanc Regulam Fidei subdolè texi-
turavit, qua nec expressè damnatus videretur Eutyches,

nec

nec satis, ut opus erat, explicaretur Incarnationis Mysterium falsa doctrina ab Eutychete corruptum. Cum igitur hæc Formula Fidei, velut solida, & pura subscribenda Patribus traderetur, & Anatolius clientelæ sequela tumidus negotium intenderet, reclamarunt Apostolicæ Sedis Legati vehementissimè urgentes, ut Fidei Definitio juxta Regulam à Leone in sua Epistola expressam componeretur. Admodum pauci, quanquam tutiorem, & integram, Legatorum Sententiam amplectebantur, quia Anatolii sollicitudo ac dexteritas omnium prope animos occupaverat, adeo ut si suffragiorum numero dirimenda res esset, Legati multitudine obruti planè irriti destitissent. Inter has animorum jactationes, & dissidentium undiq; strepitus, Judices laici ad fortuitos compeccendos tumultus primum admissi, increpitabant, ac reprehendebant Synodi Patres, quòd, cum Leonis Epistolæ subscripissent, nunc resistere non licebat, eandem doctrinam Fidei Regulæ inseri. Verùm cum Judices nihil proficerent, ac passim ubique tumultus, & altercatio glisceret, Romani tandem Legati minati sunt: *Si non consentiunt Epistolæ Apostolici, & Beatissimi viri Papæ Leonis, jubete nobis rescripta dari, ut revertamur (scilicet Romam) & ibi Synodus celebretur.* Deinde Legatorum voces, & minas excipiens Marcianus Augustus Concilio denunciavit: *Si autem neq; hoc vestra velit Sanctitas, cognoscat, quia in partibus Occidentalibus habet fieri Synodus, eò quòd Religiositas vestra hic noluit de vera, & Orthodoxa Fide indubitanter definire.* Hoc ergo inter Apostolicæ Sedis Legatos, & universam prope Synodum certamine incalescente, vicit in suis Legatis Apostolicæ Sedis Auctoritas ex eorum voluntate Fidei Formula constituta, & Jus supra Concilium luculenter asseruit. Tum etiam quia declaravit, quod & Augusto probatum est, nec Synodus contradixit, ad Auctoritatem Apostolicam pertinere, si ita placeret, solvere Synodum, & aliò

& aliò transferre, ipsa quoque Synodo reluctante. Hæc quippe connexa, & coherentia invicem Jura sunt, Synodum dissolvere, ac Synodo præminere. Quapropter Concilium Lateranense sub Leone Decimo celebratum, sess. 1. *Solum, inquit, Romanum Pontificem, tanquam super omnia Concilia potestatem habentem, Conciliorum faciendorum, transferendorum, ac dissoluendorum plenum jus, & auctoritatem habere: in quo nihil novi Lateranense Concilium adjecit, ipsa Chalcedonensi Synodo prælucente, ejusque exemplo novo Decreto condito.*

Præterea cum inter Antiochenum, & Hierosolymitanum Antistitem disceptatio de jurisdictionis limitibus exarsisset, multumque negotii Patribus ob partium divisiones, oppositosque conatus Causæ resolutio facesseret, Apostolicæ Sedis Legati litigio dirempto in hunc modum singulare Decretum composuerunt: *Ut Antiochensium Ecclesia duas Phanicias, & Arabiam habeat, Hierosolymorum verò tres Palestinas possideat; ad hoc autem & nostra humilitatis interlocutione firmentur, ut nulla in posterum de hac causa prædictis Ecclesiis contentio relinquatur.* Hæc Paschasius Collegarum quoque consensu pronunciavit, qui tale Decretum adeo stabile, & firmum, ac simul irrevocabile auctoritate Apostolica posuit, ut etiam recursus ad Concilium præcluderetur, eo siquidem omnes de cætero contentiones exhaustas affirmat; quod utique fieri non posset, nisi Apostolica auctoritas prævaleret. Super hæc præclarum de Suprema Romani Pontificis, ac præsertim supra Synodos potestate nobis suggerit testimonium Atticus Nicopolitanus Episcopus unus ex Synodi Patribus, qui post publicè recitatam Sancti Leonis epistolam hæc in ejus laudationem effudit: *Quoniam nunc Domini nostri, & Sanctissimi Patris, & Archiepiscopi Leonis adornantis Apostolicam Sedem lecta est Epistola.* Sic duplici planè jure Pontificiam auctoritatem supra Concilium extollens, jure scilicet

cet *Dominus*, & *Patris*; quis enim, nisi imprudenter, audeat, Ministros supra Dominum, vel Filios supra Patrem statuere, cum alterum Juri Gentium, alterum Juri Naturæ obftet? Habes hic igitur in Romano Pontifice, quem ut Patrem diligas, & ut Dominum metuas. Noli Patri obedientiam, cultum Domino pro Synodo tollere. Nec iste tantummodo Antistes communem *Patrem* Leonem appellat, sed frequenter in tota Actorum serie hoc venerabile nomen usurpatum pro Pontifice occurrit. Quinimo & Universa Synodus in Synodica Epistola, qua Actorum Confirmationem à D. Leone poposcit, *Patrem* ipsum vocat, pag. 112
& *Ducem*, & *Magistrum*, & *Dominicæ Vineæ Custodem*, & *Caput*, nimirum tum Synodi, tum Ecclesiæ, ut ferè omnia Sedis Apostolicæ privilegia, quæ tantopere contra opinantes oppugnant, non adumbrata, sed expressa in illa Epistola conspiciantur, cui Patres supra quingentos, flos, & decus Catholicæ Ecclesiæ, subscripserant. Sed inter omnia argumenta, quæ pro Papæ potestate supra Concilium decerpi ab integro Actorum Volumine queunt, magni quidem roboris, & momenti, ac simile Achilli videtur illud de Canone Constantinopolitanæ Ecclesiæ post Romanam Primatus ab Anatolio fraudulenter extorto. Multa nova, scituque digna circa Canonem istum congerit Auctor. Cæterum cum Universi Concilii Patres per Synodalem Epistolam, simul Marcianus Imperator, & Augusta Pulcheria, alique minoris notæ impensius, & crebrius Leonem oraverint, ut præfatum Canonem Auctoritate Apostolica confirmaret, inania vota, & irritæ preces cessere, undique obtruso, & inconcusso Leone, cunctisque idibus inflexibile. Quod si Concilium supra Romanum Pontificem staret, incassum ad illum Canonem stabiliendum tantum perturbationis, atque tumultus concitatum fuisset: leues illi viri censendi essent, qui tanta sollicitudine, ac studio illius Canonis firmitudinem à Romano

mano Pontifice mendicaret, qui à Synodo, id esset, à superiori potestate, compactus suamet conditione subsisteret: nec minus reprehensione dignus Leo ipse putandus esset, qui altiori statuto, & potestati sublimiori, curvare cervicem dedignaretur. Tot absurda, tot rerum ludibria simul vorare necesse est, qui fortè arbitretur, illos Chalcedonis Patres, illam aulam Imperatoriam, & Græcorum Antistitum greges, Jus supra Leonem Oecumenicę Synodo concessisse.

Antequam tertium Armamentarium adversus negantes Pontificiæ Cathedrę circa res Fidei irrefragabilem Veritatem instituiam, placet, quędam simul congesta, & per transitum tacta argumenta subducere ex Opere, quorum pleraq; hanc eandem Infallibilitatem, & Pontificiam simul supra Concilium Auctoritatem evincunt, unde mistum quasi quoddam coalescit armamentariũ. Pro re proposita primum occurrit illud pondus, gravitas illa verborum, quibus Divus Leo damnationis Sententiam impio Eutycheti, nisi ab errore, ac insania desisteret, minatus est: *Quamvisque*, inquit Leo, *si in suo Sensu voluerit permanere, nullus poterit relaxare*. Nullus, consultò ait, nullus scilicet Judex in terris, nulla Synodi Auctoritas, nulla alia intra Ecclesię orbem constituta potestas, rescindere Pontificiam sententiam potest, aut ejus jussibus reluctari. Siquidem negativa generalis assertio omnem exceptionem exhaurit. Ubi & clarius subinde Leo se Concilio superiorem, & simul ab omni erroris macula purum & integrum profitetur, dum post Declarationem Fidei ab Apostolica Sede prolatam subjicit: *Dubitari non potest, quę sit Christianę confessionis integritas*: Nimirum hanc legem credendi in Causa Eutychetis Apostolica Sedes ponit, & Synodo imponit, quia suspicio, aut Erroris dubitatio non cadit in effusa Apostolicę Sedis Oracula, ac simul discentem oportet Magistro credere, neve Ordo Hierarchi-

chicus invertatur, aurem præstare Magistro, & Rectori ac Principi obsequium. Urget & fortius in hac materia argumentum, quod ne ipse quidem Dioscorus, aut ullus Latrocinialis illius Concilii Ephesini satelles in illo tumultu, qui humana simul ac Divina jura miscuerat, ausus est dicere, non licuisse Flaviano ad Romanum Pontificem, ut Generalibus antecellentem Conciliis, provocare, ubi *libellum Appellationis* Romanis Legatis *Flavianus Episcopus dedit*, cum affirmer Leo, quod sui Nuncii *Fidem plenissimè expositam, atque digestam à Sede Beati Petri Apostoli ad Sanctam Synodum detulerant*: & etiam attexat, quod cum ejus recitatio poscentibus Episcopis non sit admissa, hoc, quod factum est sine consideratione justitiæ & contra omnium Canonum disciplinam, ratum haberi ratio nulla permittit: validissimè geminæ veritati, quam propugnamus, astipulatur, quia nefas erat doctrinæ resistere, quæ iniecta divinitus mente in Leonis Epistolam fluxerat: nec minus iniquum, infra jacentem Superioris mandatum, quod Regulam Fidei in Epistola dederat, eamque legi inculcaverat, aspernari. Idque profectò est, quod contra omnium Canonum disciplinam impudenter transactum exprobrat Leo. Quid etiam, quod ipse Leo super Regula Fidei à se in Epistola tradita Synodi Patribus præcipit, ne disputatio, aut concertatio apud Synodum audaciter contrahatur. *Rejēta*, inquit, *penitus audacia disputandi, cum plenissimè & lucidissimè per litteras, quas ad Beate memorie Flavianum Episcopum misimus, fuerit declaratum, quæ sit de Sacramento Incarnationis Domini Nostri Jesu Christi pia, & sincera confessio*. Hoc planè Leoni mandare non licuisset, nisi de doctrinæ, quam dederat, Infallibilitate constaret. Præterea injuriosum; ac superbum hujusmodi foret Præceptum, nisi à Principe ad subditos mitteretur. Ceterum cum duplex sit apud Synodos disputatio, vel materiæ, de qua agitur, conquisitio: alia, quæ ad meliorem veritatis

P 22. 77

P 22. 81

P 22. 108

intelligentiam, & intellectum informandum, illustran-
 dumque, & cum pio animi affectu consociata statuitur:
 alia contumax, & proterva, & cum contradicendi pruri-
 gine, mentisque caligine ac pertinacia conjuncta: primum
 quidem apud Synodos disputandi, vel concertandi genus
 in usu, & laudibus est, quo Apostolos quoque in primo
 Hierosolymitano Concilio, cum de Legalibus abrogan-
 dis inquireretur, sapienter usos esse comperimus, Acto-
 rum 15. *Cum autem magna conquisitio facta esset surgens*
Petrus dixit ad eos: alterum verò impium & præcipitio
 pronum, quod hic Leo tantummodo prohibet: disertè
 propterea adiicitur, *audacia disputandi*. Imperat insuper
 Leo, ut Episcopi ab Ephesina secunda Synodo condem-
 nati suis sedibus restituantur: *Vulneribus*, inquit, *his*
primitus adhibeatur medicina justitiae. Rursus in persona
 Nestorii hæc Synodo Chalcedonensi mandata, & præcep-
 ta congeminat. *In Nestorium specialiter statuta perma-
 neant:* & aliàs, & crebrò huiusmodi phrascs à Divo Leo-
 ne usurpatas invenies: qui quidem imperiosè loquendi
 modi nisi Muneris celsitudine ad subditos dirigantur, non
 minus superbiam Leonis, quod asserere nefas est, tam li-
 center altiori Potestati loquentis, quàm Concilii patien-
 tiam, ac prope torporem, quia tam præpostera pati posset
 Imperia, coarguerent. Inde quoque moralis quædam
 Necessitas ex Juris tum humani, tum Divini, dictamine in
 Synodi Patribus surgit, & Fidem Leonis probandi &
 ejus Præceptis obediendi. Idcirco cum apud Chalcedo-
 nense Concilium Flaviani Causa discuteretur, & maximè,
 an jure proscriptus ab hæreticis esset, tunc, sicut Acta
 referunt, *Lucentius Reverendissimus Episcopus Vicarius*
Sedis Apostolicae, dixit: *Quoniam san. mem. Flaviani Fides*
concordat cum Apostolica Sede, & Patrum Traditione, sen-
tentiam, qua illum ab hæreticis constat esse damnatum,
ipsam in eos retorqueri à Sancta Synodo necesse est. Hoc
 porro

porrò ut Apostolicæ Sedis Vicarius, & Apostolica auctoritate Lucentius expressit, nimirum Fidei doctrinam expositam à Leone esse Regulam inmutabilem, & simul iuxta ejus directionem Sententiam in hæreticos retorquendam: quorum primum ad doctrinæ soliditatem & robur, alterum ad Jurisdictionem, quæ in Leone supereminet, spectat. Aliud & tersius in hac materia Legatus alter telum contorsit, quod tertio armamentario seponitur.

Robustum præterea, ac nervosum pro utroque assumpto argumentum ingerunt nobis ejusdem Synodi Acta in Sententia damnationis iustè Dioscoro à Synodo inflictæ, quæ sic Leonis Auctoritate, ac Nomine, Synodique Ministerio conflata prodiit. *Sanctissimus, & Beatissimus Archiepiscopus magna & senioris Romæ Leo per nos, & per præsentem Sanctam Synodum nudavit eum* (scilicet Dioscorum) *tam Episcopatus, &c.* Exploratum est autem, & omnimodè certum, quod ea Decreta, quæ publici Consilii, Cætusve consensu condita sub Unius dumtaxat nomine maximè condita promulgantur, hunc ipsum totius Communitatis Rectorem & Caput indicant. Idcirco Romana flore ac longè latèque dominante Republica, quia Potestas civilis cum legibus cunctos æquabat, gradumque Regiminis per orbem ductum Populi arbitrium circumferebat, ejus Decreta, sive statuta, Senatus Consultum, aut Plebiscita nuncupabantur, & gubernandi formulæ erant: *Senatus Decrevit, Populus jussit.* Sed lapsa, & corrupta tandem Republica, & in formam Monarchicam versa, graviora Decreta, quanquam Senatus quoque suffragio composita, Imperatoris titulo ac nomine dimanabant. Sic etiam Generalium Comitiorum Decreta sub Monarcha Principe constituta, memoratò Comitiorum, assensu sub signo, ac nomine Principis divulgantur. Cum ergo in Dioscorum lata Sententia Leonis, quanquam ab-

pag. 195

nodi Patres tanquam Leonis Ministros executioni illam mandasse notetur, quibus his fortè clarioribus radiis delin-
 neari Potestas Papæ supra Synodum potest? Rursus idem
 Dioscorus hujus sententiæ fulmine ictus cecidit, quia re-
 jecta Leonis Epistola, nec eam recitari in Ephesina Sy-
 nodo passus, simul in illa à Leone Fidei doctrinam ex-
 pressam abiecit: *Leonis Epistolam recitari prohibuit* (Diof-
 corus scilicet) *Reverendissimis Episcopis: & hac cum San-*
ctissimus, & Beatissimus magna Romæ Archiepiscopus Leo
scelestam Eutychis in scriptis damnaasset perfidiam. Quod
 si aliquo pacto de doctrina Fidei Leonis ambigere, vel
 hæsitare fas erat, iniqua planè in Dioscorum jacta Sen-
 tentia, iniquior executio censenda esset, quæ inanis
 utrique suppositio non minus Leonis Auctoritatem, quàm
 Synodi integritatem exulcerat. Aliud & Auctor cumulat
 argumentum, quod lectis Nicænæ Synodi Actis, & cum
 Leonis Epistola comparatis, Patres exclamaverunt: *Papa*
Leo ita interpretatus est. Post verò lectas Divi Cyrilli
 Epistolas, quas in suas Sacra, & Prima Ephesina Synodus
 adoptaverat, iterum Patres acclamaverunt: *Leo Episcopus*
ita sapit, ita credit, ita scripsit: & quod rursus ejusdem
 applaudendo doctrinæ Patres intonuerunt: *Petrus per Leo-*
nem ita locutus est. Ex quibus locis dilucidè Auctor Sum-
 mi Pontificis Infallibilitatem, & jura supra Concilium as-
 ferta colligit, quoniam ejus Authoritas nervos, ac pon-
 dus Synodicalis definitionibus daret. Sed latius videtur
 mihi patere argumentum: nimirum Leonis de Fide do-
 ctrinam cum Nicæno, & Ephesino quoque Concilio con-
 cordem probatam esse, quia idem Divinus Spiritus, qui
 sibi discors aut bilinguis esse non potest, in Papa Leone,
 & in Nicæno, & Ephesino quoque Concilio locutus est,
 cum hoc tamen interjecto discrimine, quod hic Cælestis
 afflatus à Romano Pontifice in Synodum, tanquam à Ca-
 pite in membra, diffunditur. Disertè hanc veritatem,
 ostendit

ostendunt Melchior Canus lib. 5. de locis cap. 5. & Valentia tom. 3. disput. 1. quæst. 1. fatentes ibi, Divini Spiritus suavitatem, & lucem pro Fidei condendo, vel declarando Decreto, Romano Pontifici tanquam Ecclesiæ Capiti impressam, ex illo in Synodos, in Ecclesiam effusam, velut reflexam, & communicatam lucem irradiare. Suffragatur huic Theologorum doctrinæ præclarus Sacræ Scripturæ Textus. Etenim cum ex Sacra Scriptura, & Patrum amplissimo testimonio habeatur, Petri Sedem, & Cathedram Moysis Cathedræ successisse, de Moysis Regimine & Cathedra Sacra Scriptura testatur Num. 11. *Et dixit Dominus ad Moysen: Congrega mihi septuaginta viros de senibus Israel, quos tu nosti, quod senes populi sint, & Magistri, & duces eos ad ostium Tabernaculi sederis, faciesque ibi stare tecum, ut descendam, & loquar tibi, & auferam de spiritu tuo; tradamque eis, ut sustentent tecum onus populi, & non tu solus graveris.* Quod ita eleganter explicat Glossa: *Moses, & Spiritus, qui erat in eo, quasi clarissimi luminis lucerna fuit, ex qua Deus septuaginta senes accendit, ad quos principalis luminis splendor advenit, & origo illius nihil damni ex diminutione accepit.* Porro hoc exemplo quomodo per Summum Pontificem Deus suam Ecclesiam docendo illuminet, exprimi, Divus Bernardus luculenter exponit lib. 4. de considerat. cap. 4. qui Papam Eugenium de ejus Muneris amplitudine instruens, ac de Episcoporum subjectione. *Qui (scilicet Episcopi, inquit) de tuo spiritu, illorum instar septuaginta Moysi, accepissent, per quem sive presentes, sive absentes contendant placere tibi, placere Deo.* Postremo hanc Infallibilitatem circa res Fidei à Summo Pontifice Synodi Patribus communicari, & ipsam cum Supremo Regimine stabili conjunctam esse, nemo eloquentius, quàm Divus Cyprianus explicuit, qui in Tractatu de Unitate Ecclesiæ, ubi à Christo collatum Petro Primatum, & unum Caput, &

nam

unam originem posuit, & unam Cathedram in Ecclesia, unde Fidei Oracula fluunt, his di&is adjecit: *Quomodo Solis multi radii, sed lumen unum, & rami arboris multi, sed robur unum*: quia sicut à Sole Orbis terræ splendorem & lucem, & à robore rami vegetandi, & fructificam sobolem emittendi virtutem hauriunt, ita unum lumen est, & lumen Capitis, sive originis in Ecclesia, à quo mutuatum cætera membra veritatis splendorem habent: alius quippe veritatis Divinæ radius jacitur in Ecclesiam, alius in Concilia, quæ ideo Romanus Pontifex sua Auctoritate, suo jure congregat, sustinet, & confirmat. Sed isti multi radii, quos enumerat Cyprianus, ad Apostolicam Sedem, & Cathedram, tanquam ad Caput, & lumen unum, & quæ primam lucem à lucis Auctore accipit, & in Ecclesiam effundit, juxta Cypriani sententiam referri debent. Propterea Sacri Interpretes animadvertunt, Christum constituisse, ut Apostoli, qui Ecclesiam repræsentabant, Petri ore discerent, se esse Christum Filium Dei vivi, quod Pater Æternus Petro, & Petrus Apostolis revelavit. Et huc quidem veteres Episcopos Gallos in Synodo congregatos spectasse censeo, cum relectam Leonis de Mysteriorum Incarnationis Epistolam studiosissimè complectentes his egregiis laudibus exornarunt, dum Leoni rescripserunt: *Apostolatus vestri scripta, ita ut Symbolum Fidei, quisquis Redemptionis sacramenta non negligit, tabulis cordis adscripsit, & tenaci, quò ad confundendos hæreticorum errores paratior sit, memoria commendavit: irrefragabilem scilicet, velut Symbolum Fidei, doctrinam Leonis cum Suprema Regiminis Potestate ne&tentes: Divus quippe Thomas, quo nemo do&tor, aut sanctior Parisiensem Cathedram subiit, 2. 2. quæst. 1. art. 10. ubi quærit, & probat, ad Summum Pontificem pertinere Fidei Symbolum ordinare, hoc ibi deducit ex plenitudine Potestatis, qua totam Ecclesiam Romanus Pontifex implet. Dicit enim: Hujus ratio*

ratio est, quia una Fides debet esse totius Ecclesiae secundum illud. 1. Corinth. Idipsum dicatis omnes, & non sint in vobis schismata: quod servari non posset, nisi quaestio Fidei de Fide exorta determinetur per eum, qui toti Ecclesiae praest, & sic ejus sententia à tota Ecclesia firmiter teneatur. Ubi Angelicus Doctor firmat, munus de rebus Fidei infallibiliter decernendi in eo residere oportere, cui Universalis Ecclesia, ac proinde Concilium, quod intra Ecclesiae limites est, subiicitur: & hunc esse Romanum Pontificem. Immensam prope molem susceperem, si omnia, & singula vellem complecti, quæ uberrimè Auctor in suo Volumine exponit. Expendantur ea, quæ idem affert in Capite quadragesimo sexto de robore adiecto à Patribus Chalcedonensibus Ephesino Primo Sacrosancto Concilio à Confirmatione Cælestini, atque Sixti Romanorum Pontificum: ex quibus disertè Pontificia Infallibilitas, & Præstantia supra Synodos Generales evincitur. pag 150

Nunc ad tertium, & separatim instruendum Armentarium progredior, quo seorsum circa res Fidei Apostolicæ Sedis Infallibilitas propugnatur; hoc enim maximè Christianæ Reipublicæ interest, nam rarò cogi Universalia Concilia solent, Definitiones verò circa doctrinam Fidei frequenter à Sede Apostolica manant. Et hoc quidem ad Ecclesiae Monarchiam pertinet, quæ in Unitate consistit, & hæc à Fide quoque Unitas derivatur. Sunt etiam quædam in Regno Leges, eas vocant fundamentales, quas nec ipsi Monarchæ laxare, aut remittere licet, alioqui fundamentis evulsis, fas esset evertere regna, subditosque gratuito perire. Hujusmodi Legem fundamentalem Galli Salicam vocant Regibus etiam irremissibilem, quibus ejus custodia, non dispensatio permessa est. Quapropter cum Henrico Tertio Rege sublato per eam, occasionem æmuli Reges vellent Francicam Monarchiam membratim scissam diversis Regulis tradere, aut integram titulo

titulo dotis ad externos transire : cumque antiquius Bur-
 gundiæ Duce à Delphino interfecto ob pœnam criminis
 ab aliquibus tractaretur, ut Delphino Regnum ademptum,
 jure hæreditatis, aut dotis ad Galli Regis filiam, quæ Re-
 gi Anglo nupserat, deferretur, tunc Gallicanam Monar-
 chiam fluctuantem, & in excidium prope vergentem al-
 tius impressa Regibus, atque populo Legis Salicæ reve-
 rentia in suo splendore, & opulentia continuit. Similiter
 cum Fides, & Lex, ac doctrinæ Fidei, præter naturam
 æternæ veritatis immobilem, compages, & fundamen-
 tum Ecclesiæ Catholicæ sit, Summus Põntifex Monarcha,
 & Legislator Ecclesiæ, hujus Divinæ Legis minimè rela-
 xator, sed Assertor, & Vindex, aut Interpres, & Judex
 Supremus habendus est. Et profectò ne Eutychetem qui-
 dem Hæresiarcham hæc Catholica veritas latuit, qui non-
 dum in profundum erroris immersus, aut pertinacia tan-
 dem absorptus, & quibusdam per id tempus veræ doctri-
 næ interlucentibus radiis, scripsit Divo Leoni Papæ, cæ-
 teris se Fidei Magistris omiſſis, ipsius dumtaxat Leonis ut
 Fidei Supremi Judicis, & primam Judicii Cathedram oc-
 cupantis, Sententiam per omnia secuturum fuisse. Quod
 etiam Leo Concilio Ephesino secundo scribingens in hunc
 modum testatur : *Quod etiam in libello, quem ad nos mise-*
rat (scilicet Eutyches) est professus, spondens per omnia nos-
tram secuturum se esse sententiam . Hoc ipsum eidem Eu-
 tycheti Divus Petrus Chrylologus per literas inculcavit,
 ita illum erudiens, ac docens : Apud Sedem, sive Cathe-
 dram Divi Petri veræ Fidei inhærere, & constare doctri-
 nam, & qui in illa sedet, puræ Fidei Oracula prodere : ibi
 eam inquirendam, & indagandam esse, nisi quis tortuoso
 itinere frustra volvi, ac denique labi malit. Hæc sunt ver-
 ba Divi Chrysologi : *His, quæ à Beatissimo Papa Romanæ*
civitatis scripta sunt, obedienter attendas, quoniam Beatus
Petrus, qui in propria Sede vivit, & præſidet, præstat quæ-

rentibus Fidei veritatem . Dicit autem , hucusque Petrum in sua Sede vivere , ac præsidere , non ratione Personæ , sed Officij , atque amplissimæ Potestatis in ejus Successorem transfusæ .

Hæc præterea incorrupta Fidei doctrina, & cum Apostolica Sede connexa irrefragabilis veritas , ita se sola pro certitudine sufficit , ut pro integritate , ac firmitudine sua nequaquam Synodorum adminiculo egeat , cum satis illi vigoris , & nervi ab ipsa Cathedra , tanquam veritatis radice altiùs à Christo posita , fluat . Proinde Eutychetis errore cum magna fidelium strage grassante, nec dum ipso errore Synodi ope discusso , cum Divus Leo mirabilem Epistolam , quæ Incarnationis Mysterium expresserat , tenuisset , Juliano Coensi Episcopo scripsit, hanc unam Epistolam satis , superq; esse , quæ Eutychianam hæresim jugularet : *Sufficientes literas misimus ad confirmandos animos* (scilicet in Fide) *non solum Sacerdotum , sed etiam laicorum* . Clarius hoc ipsum idem Pontifex explanavit , cum Flaviano scripsit : *Ut amputatis dissensionibus Fides Catholica inviolata servetur , & his , qui prava defendunt , ab errore revocatis , nostra Auctoritate , quorum fides probata fuerit , muniatur* . Ubi Divus Leo , à se de Fide doctrinam traditam corruptelæ remedium , disciplinam errantium , & Fidei munimen vocat . Et Flavianus Divo Leoni rescripsit : *Sic enim hæresis , quæ surrexit , & turba , quæ propter eam factæ sunt , facillimè destruentur per vestras sanctissimas Literas* . Et postea subdit : *Removebitur autem Concilium , quod fieri divulgatur , quatenus nequaquam ubique turbentur Ecclesie* . Atque idem Beatus Leo de eodem Eutychetis negotio conficiendo , & veritate Catholica confirmanda loquens Imperatori Theodosio ipsum per Epistolam monuit : *Quamvis evidenter appareat , rem , de qua agitur , nequaquam Synodali indigere tractatione* . Ad quarum literarum intelligentiam præmittere oportet : Dioscori sce-

f

lere

PAG. 55.

PAG. 45.

PAG. 55.

PAG. 55.

lere apud Synodum Ephesinam Secundam, quæ ad Euty-
chianani hæresim elidendam convenerat, hæc tumultuosè
aucta, ac nefariè firmata est, adeo ut illa Synodus, quæ
Ecclesiæ solatium esse debebat, & credebatur, exulceratio
fuerit. Novum convocare Concilium, ut nonnulli cen-
sebant, nuper illatam ab Ephesino perniciem reparaturum,
res aspera videbatur ob Theodosium Imperatorem studio-
sius erga Dioscorum inclinatum, eique fomenta præben-
tem, quibus incendia excitaret, nunc verò ipsum Diosco-
rum rebus secundis inflatum, ac longa licentia tumidum,
corruptas partes augmentem, & omnino veritati recalci-
trantem. Tot Ecclesiam prementibus atque inundantibus
malis, una eademque Catholicorum sententia erat, sicut
etiam Leoni Flavianus exposuit, ut, Synodo prætermissa,
Leonis à Cathedra de Incarnationis mysterio pronunciata
Sententia, loco Concilii Fidem confirmans, hæreticas
turbas prosterneret. Verum quia paulò post improvisus,
& miserabilis Theodosii Imperatoris interitus Marcianum
Imperio dedit Fidei defensorem acertimum, ex eo Con-
cilium Chalcedonense, quo, urgente Leone, Eutyches
penitus fractus est, facile patuit.

Cæterum nullum se vera Conciliorum Chalcedonen-
si liquidius, & clarius pro Fidei doctrina Apostolicæ Sedis
Infallibilitatem asseruit. Sub hujus Synodi initium cum
de Causa Flaviani res ageretur, utrùm æquè, an iniquè in
Concilio Ephesino proscriptus à Dioscoro fuerit, ideoque
Fidei confessio à Flaviano quondam emissa examini sub-
deretur, extat Paschasini Romani Legati Actis inserta
Sententia sic attestantis: *Sanctè, & integrè, & Catholicè*
Fidem exposuit beata memoria Flavianus, siquidem eius Fi-
dei Expositio cum Beatissimi, atque Apostolici viri Papæ Ro-
mani Epistola concordat: quam sententiam tota Synodus
collaudavit, & amplexa est. Mensurà pròinde, ac Regula
Fidei veritatem inquirentibus, & inter se consultantibus

Patribus, Fideique articulos perpendentibus, Leonis Episto-
 la erat; ideo enim erroris expertem Flavianum Antistiti-
 tem asserunt, quia in Fidei doctrina cum Leone concor-
 dat. Illa autem dicitur Regula, qua cum quis composi-
 tus rectè graditur; qui verò ab ea deviat, sive discordat,
 aberrat: sicut errare, ac præcipientes ire necesse est, qui hanc
 Regulam non sequuntur. Plus quidem dicunt, & contes-
 tantur Synodi Patres de Infallibilitate, quæ ratione Officii,
 atque Primariæ Sedis in Romano Pontifice constat, nimi-
 rum, qui ejus sanctionibus circa res Fidei inanantibus am-
 biguus, vel incredulus est, pertinaciæ incurtere scopu-
 lum, prope frangi, pænæque Anathematis subjacere. Pu-
 blicè quippe in Synodo lecta Divi Leonis Epistola, quæ
 Incarnationis mysterium, pravè, & iniquè ab Eutychete
 implicatum, atque confusum, certis definitionibus expli-
 cabat, & proponebat, sicut referunt Acta, Reverendissimi
 Episcopi clamaverunt: hac Patrum Fides, hac Apostolorum
 Fides: omnes ita credimus, Orthodoxi ita credunt. Anathema
 ei, qui ita non credit. Ubi advertere prodest, hoc Ana-
 thematis fulmen jactum à Patribus esse, antequàm Syno-
 dica Definitio, quæ postea confecta est, contra Eutychia-
 nam hæresim prodiiisset, quia satis compertum jam Patri-
 bus erat, etiam Concilii auctoritate seclusa, valere contra
 incredulos pro Fidei Decreto Anathematis jaculum, si Pa-
 palis Definitionis numeris contortum impelleretur. Porro
 autem videtur hic Textus de Excommunicationis ferendæ
 sententia loqui; verum deinde argumentum dilatans latè
 quoque Sententiæ adversus illum Excommunicationem
 adjungit, qui Decreto de Fide à Romano Pontifice posito
 reluctatur, dum asserit: aut consentiant Epistolæ (scilicet
 Leonis) aut regularem damnationem suscipiant, & cognos-
 cant, quia excommunicati sunt. Ubi Auctor quasi proba-
 bili ratione discurrit, extatè fortasse Canonem veterem,
 illisque temporibus notum, vel Ecclesiæ Traditione trans-
 missum,

missum, cujus vigore, qui Definitionem circa res Fidei Sedis Apostolicæ spreverit, eo ipso Censuræ poenam incurrat. Quod conjecturæ cujusdam genus non mihi omnino alienum à veritate videtur.

At his, aliisque prætermis, clariùs, & manifestius idem Chalcedonense Concilium exposuit, Definitionem circa res Fidei à Sede Apostolica constitutam, perpetuam, infallibilem, & irrevocabilem permanere. Quippe cum apud Synodum ageretur de Regula Fidei à Divo Leone in sua Epistola exposita, & qua ratione, & officio cæsequenda Patribus esset, Fidei Canonem contra Eutychem composituris, in hunc modum ipsi Patres enunciarunt:

PAG. 138 *Ita omnes dicimus, sufficiunt quæ exposita sunt (in epistola nempe Leonis) alteram Expositionem non licet facere. Nota hæc, & memoria quoque recurra: Alteram expositionem non licet facere. Nimirum non licet Synodo, ut ipsa pleno fatetur ore, Definitionem de Fide à Romano Pontifice conditam emendare, retexere, aut diversam ab illa alteram substituere, quia hoc ipsum utique foret, mentiri Oraculo Scripturarum, ac Spiritui Sancto resistere, cujus ore, afflatuque Gentibus Petrum evangelizare ipsi Concilio Hierosolymis congregato idem Petrus asseruit, Actor. 15. Viri fratres vos scitis, quoniam ab antiquis diebus Deus in nobis elegit per os meum audire Gentes verbum Evangelii & credere. Et huc etiam spectat illud, quod postea subditur: Visum est Spiritui Sancto, & nobis; quia impulsus Divini Spiritus à Capite in membra coherentia defluit.*

Quod si Basileenses obijciant, quod refert Natalis Alexander in 3. parte Seculi 15. & 16. dissert. 8. quondam objecisse, hanc ipsam Leonis Epistolam fuisse à Chalcedonensi Synodo diligenter excussam, rigidoque Examini addictam, quod certè otiosum fuisset, si illam ab omni Erroris suspitione remotam, & absque dubio impollutam, & integram Patres existimassent; sapienter, & validè Aug.
tor

Ator hæc fallacia objectamenta dissolvit. Etenim talis
 Epistolæ recognitio non propter Catholicos evincendos
 permisa est, sed propter hæreticos, qui magno ubique
 strepitu, fremituque jactaverant, doctrinam Leonis in illa
 Epistola expressam cum Nicæni, aliorumque veterum
 Conciliorum doctrina aperte pugnare. Illa propterea ad-
 missa, disciplinam Ecclesiæ; Fidemque Catholicam om-
 nino perditum iri, quorum mendaces, & garrulæ voces
 omnem penè Orientem impleverant. Cum igitur aut de-
 docenda, aut perdenda esset tanta hominum multitudo,
 Apostolicæ Sedis Legati Leonis Epistolæ recognoscendæ
 assensere, sed ante scrutinium per Paschasium priorem
 Collegam protestati publicè sunt: *Leonis scripta, quid ve-
 ra Fides habeat, exposuerunt; similiter Sancta Synodus hanc
 Fidem tenet, hanc sequitur: nihil amplius nec addere potest,
 nec minuere.* Cujusmodi est ergo hujus Epistolæ Examen,
 quo nihil Epistolæ addi, vel demi licet? Profectò Jurisdi-
 ctionale non est, nam Jurisdictio rei, quæ subest, arbitrium,
 & dominium importat, à quo illi vacabant, quibus Leonis
 Epistola ad Examen porrecta, irreprehensibilis, & suo te-
 nore immutabilis consistebat. Quis autem, nisi immeritò,
 supremo Judici imponat, quemadmodum homines isti re-
 spectu Papæ esse Concilium jactant? Vide hanc Senten-
 tiam ab inferiori Judice latam, sed nihil omnino tibi fas
 est illi addere, vel minuere. Itaque Doctrinale tantum-
 modo Examen est, nimirum ad ignaros, & imperitos eru-
 diendos, vel ad perfidos revincendos, seu pudore, ac de-
 decore castigandos, qui in cælum, sive caelestem Leonis
 doctrinam os frigidum ponere non horruerunt. Nec ista
 quidem emissa Romani Legati vox: *Nihil amplius nec ad-
 dere potest, nec minuere:* quæ suæ facultatis Synodum ad-
 monebat, neglecta, vel irrita, vel ingrata Patribus ceci-
 dit; nam sic protestanti Legato statim Synodus acclama-
 vit: *Omnes sic credimus, sic credidimus.* Post autem discus-

422. 208

Pag. 100

11. 102

ſam Divi Leonis Epistolam, & cum veterum Conciliorum doctrina conformem inventam, dixit Anatolius Constantinopolitanus Antistes: *Manifestum est; nec poterat dubitari, unam Fidem Beatissimi Papæ Sedis Apostolicæ Rectoris cum trecentorum decem, & octo apud Nicæam Patrum concordare.* Quid ergo erat Examine opus, si cadere in dubium non poterat, quemadmodum Anatolius, alique deinde Patres loco sententiæ professi sunt, certitudo doctrinæ à Papâ Leone de Fide propositæ? Dicendum itaque est, eam discussionem Epistolæ, utilitatis profectò causâ, non autem necessitatis, apud Concilium inductam, quia scilicet facilè ea sedulitas poterat ora hæreticorum obstruere, & caninos tundere dentes contra Leonis Auctoritatem attritos.

Secus hanc manifestam, ac prope palpabilem negantibus, vel implicantibus veritatem ad eam exprimendam iis clariora, quæ Textus suggerit, verba non suppetunt. His ad uberiores, & clariorem doctrinam adiicio, quod omni arbitrio, ac tergiversatione sublata cogebantur Episcopi, nisi Synodo expelli mallent, & suffragii jus intermittere, Leonis subscribere Epistolæ, ejusque doctrinam amplecti. Eapropter post hanc subscriptam Epistolam, ejusque doctrinam testimonio publico assertam, Synodus exclamavit: *Sic sapiamus, sic credimus; Patres ad Synodum: qui subscripserunt; ad Synodum: & propterea tredècim Episcopi Egypti, qui subscriptionem non recusare, sed dumtaxat speciosa prætexta causa differre post lachrymarum imbrem, & sordidas preces obtinuerunt, nudati jure suffragii à Synodo ejecti sunt.* Et planè barbaries, ac trucidis quædam species Tyrannidis foret, quam nefas est notam Sacræ Synodo inurere, si de Fidei Doctrinâ à Leone ex Cathedra posita ambigere licuisset, in illa hæsitantem affligere, ac rigida pæna percutere. Nec re vera hujusmodi præjudicium in Causa Synodi propria, & in Juris sui

læſionem, & fraudem, ſi hoc Pontificio præcelleret, Synodi Patres otioſe, vel tacite paſſuros unquam fuiſſe credendum eſt. Huc etiam pertinet gravis illa Sententia Sardinum Antiſtitis, qua de Doctrina Leonis in Fidei materia ſoliditate, & candore Synodi Patres admonuit; cum enim plures Episcopi jam antea Leonis Epistolæ ſubſcripſiſſent, & is ex illorum numero eſſet, conſtanter aſſeruit, omnes, qui Dogmata Fidei illarum Literarum ſubſcriptione profeſſi erant, nihil habere, quod circa Fidei Doctrinam expolire, vel flectere poſſent, vel emendare: quod eſt idem ac dicere, quod documenta Fidei Leonis Auctoritate firmata nec correctioni, nec varietati, nec corruptele ſubjecta erant: *Quamvis in noſtra perſona, qui Epistolæ Sanctiſſimi Leonis ſubſcripſimus, non indigemus correctione.* Pag. 139

Coronare tandem, atque vallare univerſam hanc quæſtionem ea ſententia merito poteſt, quam Auctor adducit ex Allocutione Concilii Chalcedonenſis Marciano Cæſari facta, ubi omni errori *impenetrabilem* Papam Leonem Concilium appellat: *Unde nobis impenetrabilem in omni errore. Propugnatorem Deus providit, & Romana Eccleſiæ Papam ad victoriam præparavit, doctrinis eum per omnia veritatis accingens, ut quem admodum fervens affectu Petrus, & hic affectu ſerentiore decertans omnem ad Deum ſenſum, intelligentiamque perducit.* Mihi verò complures de hoc argumento ſententias hic, & alibi longo tempore volutanti nulla unquam ſententia occurrit, quæ vehementius, & clariùs pro Fidei Decretis Romani Pontificis Infallibilitatem animo infigeret, atque inculcaret. Alteram ejuſdem claritatis, & nervi, licet minorem auctoritate, ſententiam Divus mihi Bernardus ſuppeditavit Episto-
la 190. ad Innocentium Summum Pontificem. *Oportet, ad veſtrum referri Apoſtolatum, pericula quaque emergentia in Regno Dei, & præſertim qua de Fide contingunt; dignum namque arbitror, ibi potiſſimum reſarciri damna Fidei, ubi* Pag. 145

1

non

non possit Fides sentire defectum; hæc quippe hujus prærogativa Sedis; cui enim alteri aliquando dictum est: Ego rogavi pro te, Petre, ut non deficiat fides tua? Consolidat hoc Divi Bernardi sententiæ fundamentum ex eo constans, quod expressè Christus in Petro ineluctabilem, sive, ut ajunt, indefectibilem Fidem constituit, illa Canonica sanctio in cap. Majores, de Baptism. Majores Ecclesia causas, præsertim circa Articulos Fidei contingentes, ad Petri Sedem, referendas intelligit, qui novit, pro eo Dominum exorasse, ut non deficeret Fides ejus. Sed Canonum auctoritate, quæ omnia superat, prætermittam, ut nimis effugiis adversariorum obnoxia, illas binas Sententias, Synodi videlicet, & Bernardi, equidem firmiter censeo, eludi per quascumque ambages, sed ægrè, ac difficilè posse, evinci, aut concludi, minimè posse.

Super hæc noster Auctor sollicitè totam percurrrens Tridentini Concilii Historiam à Petro Suave Polano marcido ingenio, & tartareo atramento compositam; alios expositos ibi notat, alios latentes detegit angues, qui adversus Supremam Romani Pontificis Potestatem, ejusdem Infallibilitatem, Ecclesiasticam Monarchiam, Ecclesiæ mores, & instituta, Patrum quoque sententias impiè, & iniquè detortas, & in favorem Protestantium furiale venenum effundunt, eosque in propatulo positos & explicatos ex ejusdem Sacre Chalcedonenſis Synodi locis arripitis, quasi funicularis, obvios hos Polani serpentes strangulat, & quos Suavis quasi degener amarus, & virulentos propinare fidelibus succos studeat, luculenter ostendit. Proprium Suavis Polani est, in tota historica serie vera falsis miscere, & verosimilia cum ancipitis fidei, arte fallaci diversa specie subicere, aut propriam sententiam ore alieno producere, sicque multiplici laqueo incautos homines capere, vel voluntariè deceptos satyrica quoque voluptate pellicere. Sed versipellem mirè concutit Auctor, & men-

mendacia refellit, & cuniculos aperit, & latitantem nequitiam expromit, ut nihil illi profit, ovina pelle contentum velle Lupi rabiem & famem ad satietatem explere.

Quæ quidem adversus Polanum, & pro Suprema Summi Pontificis Potestate longè plura congesta ab Auctore, argumenta, & in toto Volumine sparsa epilogi causa repetere non oportet. Solùm enim hucusque intendi, hujus optimi Libri aliquod specimen dare, primisque, ut dicitur, labris perfunctoriè gustandum præbere, similis illi, qui telam pretiosam venundaturus quædam primò segmenta, sive particulas offert, ut captum illarum pulchritudine emptorem in totius inde telæ possessionem immitat. Cæterum hæc Tria singularia, & in primis conspicua in hoc Opere invenio. Primum, quia materiam, de qua tractat, toties excussam, & ventilatam, immensisque prope codicibus plenam, ac satietate prope fastidiosam, narratione Chalcedonensis Synodi Historiæ ita demulcet, & condit Auctor, ut non minus prudenter doceat, quàm rerum varietate delectet. Alterum, quia Concilium Chalcedonense, quod super omnia Concilia Apostolicæ Sedis ornamentum, & culmen expressit, nemo præteritorum Auctorum, sicut ipse, discussit, & volutavit, nec tritas Catholicis merces, sed Novos quasi Uniones eruit, quibus Pontificiam Tiaram condecoraret. Tandem, quia dum argumentum revoluit Auctor his temporibus gracile, & offendiculis circumfusum, adversas opiniones ratiocinando infectatus, personis integris, jugulat, illi similis peritissimo sagittario, qui anguem percussit illæso corpore, cui erat anguis circumvolutus.


Præterea hanc Novæ Explicationis contextæ lucem, Chalcedonensi Synodo superadditam Sedi Apostolicæ utilissimam puto; nulla quippe frequentius, quàm ista Synodo non modò Catholici, quidam in tribus illis, quos discussimus, Articulis, tueri se posse credunt, sed & in suis

erroribus Hæretici sese reficando, & allatrando jactant, sen-
sum ejus legitimum corrumpentes; & violentas interpreta-
tiones congeminautes; quia unde magis sibi metuunt, eò
magis ex adverso conatus, & vim intendunt. Digni propte-
rea iidem Hæretici sunt, ut armorum, quibus falsò & pro-
caciter abutuntur, in seipos conversam cuspidem sentiant.
Narrat Lucianus, quod Neanthus Pythaci Tyranni Mit-
lenensium filius Orpheï citharam, quæ Apollinis templo
pendebat, ereptam dum inter sylvas ineptè pulsat, feras
discordi sonitu concitatas, & efferatas magis adegit, ut
ipsum dilaniarent. Sic idem musicum instrumentum, quod
bene tractatum feras, & saxa mulcebat, & fluminum im-
petum morabatur; mox pravè inusum conversum lapides
provocabat, & in furem belluam agebat, retortisque flu-
mina undis citharæ dum inertem obrutum ibant. Sed hæc
fabulosa, & omnino spernenda narratio est. Nos verò ex-
perimento comperimus, Chalcedonis Citharam, veram
doctrinam concinnè sonantem, & fidibus Fidem rectè
psallentem, & infidelium animos mollientem; atque in-
formantem, præterea Deo consecratam, ejusque templo
voti, & ornamenti causa pendentem, dum Hæretici arri-
piunt, & malè tractare, ac tangere audent, aspero sonitu,
atque horrifono strepitu prudentum læcessere morsus, &
Catholicos stylos ad ultionem acuerunt. Hic doctrinæ,
& eloquentiæ nervo illos cædit, & verberat Auctor, ut non
impunè ceciderit, adulterino sensu quævisse Sacri Concilii
candorem, & concentum labefactare.

Hæc habui, Illustrissime & Reverendissime Præsul,
quæ tibi, quosdam velut flores in hoc Opere, tanquam ex
amplo Viridario, collectos, & in fasciculum ductos, porri-
gerem. Hæc gloria tua domesticæ est in nepotibus aucta;
virtus enim, quæ generis claritudinem peperit, novis me-
ritis cumulata antiquum splendorem intendit. Compen-
dium breve est, & in parvo nemo magnus; sed Opus ma-
gnum

gnum est, & ad ejus mensuram, qui, ut ego, pusillus ingenio hæret, decrescere magis apparet. Quæ tamen utcumque composita, optarem sic tibi jucunda esse, ut nec tui consilii, sive mandati, nec me præstiti obsequii poeniteat. Vale, & feliciter Vale. In Ædibus Sancti Silvestri Montis Quirinalis de Urbe die 9. Junii 1693.

Dominationis Tuæ Illustris. ac Reverendis.



ROMÆ. MDCXCIII.

Humilimus & Studioſiss. Servus

D. Cajetanus Passarellus C.R.



ROMÆ: M DC XCIH.

Ex Typographia Reverendæ Cameræ Apostolicæ.
Superiorum permissu.